



# Mokokchung nung RPWD Act indang awareness sentong agi



Commissioner & Secretary to the Government of Nagaland aser Team Leader, Mission Mode Team (AIC), K. Libanthung Lotha, IAS-i jembiba noksa nung angur.

**Dimapur, Yimpoksüi/Nov. 11 (TYO):** Rights of Persons with Disabilities (RPWD) Act, 2016 indang Sensitization & Awareness Campaign Programme ka November 11, 2021 nü Hotel Whispering Winds, Mokokchung indang conference hall nung agia liasü.

Iba sentong ya Mission Mode Team (Accessible India Campaign) ajanga office of State Commission for Persons with Disabilities den lungjemer

ayongzüka liasü. Iba sentong nung Commissioner & Secretary to the Government of Nagaland aser Team Leader, Mission Mode Team (AIC), K. Libanthung Lotha, IAS ajanga Sensitization & Awareness Campaign indang rateta ashi aser nisung ajak dang osang abener tajung kaka asütsü aser mata-mabensartem temeden indang angatetba nung shilem agitsü ayongzüka liasü. Advocate, Guwahati High

Court/Legal Implications of Non Compliance, Apila Sangtam aser State Commissioner for Persons with Disabilities, Diethono Nakhro nati RPWD Act, 2016 mapa kuma inyakba aser tarutsü nung inyaksü indang rateta shia liasü.

Iba sentong nung ADC Mokokchung, Shashank Pratap Singh, IAS menden liasü aser Department tem nungi tekolakpur aser nübur lenirtemi shilem agia liasü.

# State nung National Legal Services Day mungogo

**Kohima, Yimpoksüi/Nov. 11 (TYO):** National Legal Services Authority (NALSA) kübok Nagaland State Legal Services Authority (NSLSA) ajanga Azadi Ka Amrit Mahotsav Pan India Awareness and Legal Services Week nung shilem ka ama November 9, 2021 nü National Legal Service Day munga liasü.

**KIPHIRE :** Kiphire District Legal Services Authority puri National Legal Services Day ya November 9, 2021 nü Government High School, Kiphire nung ayongzüka munga liasü.

Iba sentong nung Bendangwati Sangtam, Retainer Lawyer, DLSA Kiphire ajanga Legal Services inyakyim indang onük nung jembia liasü.

YP Singh, Senior Principal, GHS Kiphire ajanga iba sentong nung shilem agirtem dang tzüzüing-ozüing tajungtiba nung metettsü aser angazüksü asoshi DLSA inyaksangshi nung shilem agitsü ayongzüka liasü. Iba sentong nung Legal Literacy Club school pungo-Agape High School, Saramati High School, El-Beth High School, GHS Kiphire, GHS Yangphi nungi kaketshir aser tesayur 75 dena liasü.

**DIMAPUR:** Dimapur District Legal Services Authority ajanga November 9, 2021 nü National Legal Services Day nungtem nung Deputy Commissioner's Complex, Dimapur nung Legal Camp ka amenoka Mini Legal Camp ka agia liasü.

Iba sentong nung Seyielenuo Mezhi, NJS, secretary Dimapur DLSA & CJM ajanga Legal Services Act aser Legal Services tenzükba indang jembia liasü.

Iba camp ya nüburtem asoshi lapoktsü aser iba mapang angati legal counselling, angati affidavit aser angati application tem zülüja liasü. Iba sentong nung nisung 37 tajangzük agia liasü.

**LONGLENG :** National Legal Services Day nungtem nung Longleng DLSA puri Court Complex nung Mini Legal

Services camp ka ayongzüka liasü. Iba sentong nung Secretary LDLSA ajanga Legal Services Authority kübok scheme balala agütsüba indang jembia aser Project Assistant ajanga nüburtem dang timtem mapang LDLSA office nungi teyari agitsü ayongzüka liasü.

Iba sentong nung LDLSA indang PA aser PLs temi RTE Act, Food Security Act, Social Welfare Department kübok Pension Scheme aser Lok Adalat indang video sayua liasü.

Iba sentong nung State Bank of India nungia shilem agia PMSPY, PMJJPY, APY, NPS aser Zero Account amala indang scheme balala angatetdaksü. Iba sentong nung nisung 33 nem affidavit angati agüja liasü.

**PHEK :** Phek DLSA puri National Legal Services Day nung Legal awareness sentong ka Chozuba sub-division nung ayongzüka liasü. Iba sentong nung Theodore Yanthan, ADC, Chozuba ajanga o tatsüka jembia liasü. Sentong nung shisalen sayur Samuel Ritse PP, Phek ajanga POCSO Act 2012 aser RTE 2009 indang onük nung jembia, Keneinuo Swuro PA, Phek ajanga Social Welfare Schemes & Lok Adalat indang jembia liasü.

Cheliam Khamniungan, Secy, PDLSA ajanga iba sentong nung Legal Services aser National Food Security Act 2013 indang jembia liasü. Sentong nung Kevizenuo Lohe PLV, Phek menden liasü aser yimtsüing 16 aser jila ka nungi nisung 96 arua dena liasü.

**TUENSANG :** Tuensang DLSA ajanga Anti-Ragging and Sexual Harrasment-Prevention Prohibition and Redressal seminar ka Sao Chang College indang IQAC, Anti-Ragging and Internal Committee den lungjemer Multipurpose Hall nung ayongzüka liasü.

Iba sentong nung Soteth Anar Advocate, TDLSA ajanga Anti-Ragging onük nung jembia aser Antimangyang Chang Retainer Lawyer, TDLSA ajanga Sexual Harrasment-Prevention Prohibition and

Redressal onük nung jembia liasü. Kumdilong Kessen Judicial magistrate first class Tuensang cum secretary TDLSA ajanga court inyakyim indang jembia liasü. Iba sentong nung nisung 300 arua dena liasü.

**WOKHA :** Wokha DLSA puri November 9, 2021 nü National Legal Services Day cum Mini Camp ka Chukitong Range nung yimtsüing trok ayimjema munga liasü.

Iba sentong nung Khrievono Seletsu ajanga sentong teratet indang jembia aser Echungbemo Erui, EAC Chukitong ajanga tajungshi o jembia liasü.

Adv. Meribemo A Lotha aser Adv. Shanchobeni P Lotha nati WDLA indang inyakyim aser Mini Camp inyakyim indang rateta ashi.

Iba sentong nung nüburtem asoshi Legal Help Desk ka lapoka Legal Counselling, Legal Drafting angati agütsü.

Kasa sentong nung Ministry of Rural Development kübok DDU-GKY ajanga Vocational Training agütsüba nung adentsü atema angati tenüing zülutena liasü.

Maneni iba sentong nung shilem ka ama angati temang repranga mozü agütsü, Blood Group tendangba aser HIV/AIDS tendangba angati NSACS ajanga agüja liasü.

**MOKOKCHUNG :** National Legal Service Day nungtem nung Mokokchung DLSA ajanga NALSA aser NSLSA kübok drawing competition ayongzüka agia liasü.

Iba tetoktepa ya Children's Home and Observation Home, Mokokchung nung 'The World we live in' omen nung ajemdaker agia liasü. Iba sentong nung nisung 12-i shilem agi aser takok angur nem sempet den kulizüing agüja liasü.

**ZUNHEBOTO :** Zunheboto DLSA puri National Legal Services Day nungtem nung mürekmejuba sentong ka District Court Complex, Zunheboto nung court staff, prosecution staff aser PI staff tem den külemi agia liasü. Iba sentong nung nisung 23-i shilem agia liasü.

# IRCSN pur lokti senden November 17 nü alitsü

**Dimapur, Yimpoksüi/Nov. 11 (TYO):** Indian Red Cross Society, Nagaland State Branch (IRCSN) pur 34 buba lokti senden November 17, 2021 anüingdang 11:00 ako nungi Bhavan, Kohima nung alitsü, ta sangdong ka ajanga ashi.

Iba senden nung Governor, Nagaland aser IRCSN tir, Prof. Jagdish Mukhi-i tir o jembitsü aser Chief Minister, Nagaland aser Vice-President, IRCSN, Neiphu Rio ajanga Vice-Presidential Address agütsütsü. Iba sending nung Abeni TCK menden asütsü.

# Security Forces temi Tizit nung NSCN-K (YA) züngsem ka apu



**Dimapur, Yimpoksüi/Nov. 11 (TYO):** Security Forces temi November 8, 2021 nü general area Tizit, Mon District nung Police den lungjemer operation ka agiba mapang NSCN-K (YA) züngsem ka pua liasü, ta sangdong ka ajanga ashi.

temi State Police den lungjemer operation agiba mapang ozüing alema senotsü saruba nung shilem agir NSCN-K (YA) züngsem ka pua liasü.

Iba ken o maneni bushisüingdangtsü atema pua alisang ya Mon Police Station, Mon District nem agütsüogo, ta sangdong ajanga ashi.

# Sepaitemi Dessoi nung nisung ana den IMFL apu



**Dimapur, Yimpoksüi/Nov. 11 (TYO):** Security Forces temi Police den lungjemer operation ka agiba mapang general area Dessoi, Mokokchung District nung apu aser tena ket nungi sen lakh 8 jenjang IMFL cases 220 nung November 10, 2021 nü nisung ana den Indian Made Foreign Liquor (IMFL) pua liasü, ta sangdong ka ajanga ashi.

ka agiba mapang nisung ana ya general area Dessoi, Mokokchung District nung apu aser tena ket nungi sen lakh 8 jenjang IMFL cases 220 nguteta liasü.

Iba ken o maneni bushisüingdangtsü atema pua aliba nisung ana den tena ket nungi ngutetba yi ya Longtho Police Station, Mokokchung District nem agütsüogo, ta sangdong ajanga ashi.

# Pherima nung Security Forces temi nisung ana apu



**Dimapur, Yimpoksüi/Nov. 11 (TYO):** Security Forces temi Police den lungjemer operation ka November 9, 2021 nü general area Pherima, Diampur nung agiba mapang taila Burmese oset bener alir nisung ana pua liasü, ta sangdong ka ajanga ashi.

Police den lungjemer operation agiba mapang nisung ana ya apu aser sen 29,84,000 jenjang Burmese Goods nguteta liasü.

Iba operation nung apuba nisung ana den parnok ket nungi ngutetba oset ya maneni bushisüingdangtsü atema Custom Department Dimapur, Dimapur District nem agütsüogo, ta sangdong ajanga ashi.

# Defence Minister dang 'under-water tunnel project' tekaraba nung yanglutsü mepishiogo: Assam CM



Assam Chief Minister Himanta Biswa Sarma-i Union Defence Minister Rajnath Singh den sensaksemba nosksa nung angur.

**Guwahati, November 11, 2021 (Agencies):** Assam Chief Minister Himanta Biswa Sarma-i Union Defence Minister Rajnath Singh dang Brahmaputra under-water tunnel project tekaraba nung inyaktsü ayongzükogo. "Tezpur nung Border Roads Organisation (BRO)-i inyakba Brahmaputra under-water tunnel project tekaraba nung inyaktsü mepishi" ta Assam CM Himanta Biswa Sarma-i ashi. Iba four-lane under-water tunnel ajanga Nagaon nung Misa aser Sonitpur nung Tezpur sendakteptsü.

Tzü telung nung tunnel ya kilometre 12-15 shi asütsü imlar. Taküm August ita Assam chief minister Sarma-i "China-i international border anasa aliba Arunachal Pradesh leni arutsü atema gari lenmang pungu lir saka India nungbo Bomdila ajanga lenmang ka dang lir" ta shia liasü. "Anogo ishika tejkadang ni Defence Minister Rajnath Singh den külemi Arunachal Pradesh-i ao. Indian Army-i Arunachal Pradesh-China arrtsü den sendakba lenmang ano ka yanglutsü sentong lir. Ni ashiba sülen Indian Army-i tang Misa

nungi Tezpur tashi Brahmaputra River kübok tunnel ka yanglutsü sentong renemogo. Iba ajanga tensa ajak nung Army garitem senzütettsü" ta pai metetdaksü. Brihostibarnü Assam CM Sarma-isa Defence Minister Rajnath Singh dang Assam nung Sainik School talila pungu lapoktsü atema temelaba meshi. "Assam nung Golaghat, Cachar, Dhemaji, Karbianglong aser Kokrajhar nung Sainik School talila pungu lapoktsü atema defence ministry dang mepishiogo. District Administration temi nungdakba ali renema lir" ta Assam CM-i ashi.

# Assam auto-rickshaw lendong nung nisung 9 tsükset

**Dibrugarh, November 11, 2021 (Agencies):** Brehostibar anepdang Karimganj-Tripura National Highway 8 nung auto-rickshaw ka truck den tsüktepba mapang nisung tuku tsükset aser nisung ka yiru. Baithalkhal, Karimganj district nung Brihostibar

anepdang 5:00 ako meta iba lendong ataloka liasü. Tripura nungi Karimganj leni truck ka nung cement bena aliba truck aser auto rickshaw tsüktep, ta police ketdangsür kati ashi. Nisung ka dak alaka iba auto nung mena alir ajak lendong atalokdak asü. Tasürtem rongnung tetsür aser

tanur teimba liasü, ta police ketdangsürisa ashi. Police-i iba truck pua lir saka truck anisang jena ogo. Tasümang ajak postmortem atema yokogo aser iba lendong nung yirur nisung kaji mozü kidang anepaludar. Iba lendong nung taküm samartem ano mejangjateti lir.



Arunachal Pradesh kübok Pullung nung sepaitemi police den külemi NSCN (IM) züngsem ka apuba nosksa nung angur. Parnoki NSCN (IM) züngsem ya Borduria Police Station, Tirap District ket nung agütsüogo.

# 2023 August nungi Lower Subansiri project lapoktsü: NHPC

**Guwahati, November 11, 2021 (Agencies):** Gerukamukh nung 2,000-MW Lower Subansiri Hydroelectric Project ya sangküm 2023 August ita nung lapoktsü ta NHPC Ltd.-i ashi. AASU aser AJYCP na densema telok balalai Assam-Arunachal Pradesh arrtsü nung teyangludak aliba mega-dam anema lungkak aiba sülen NHPC-i iba osang sangokja liasü. NHPC ketdangsürtemi ashiba agi, iba dam indang Unit (8) ajak August 2023 tashi nungbo lapoktsü. "Mongolbarnü Parliamentary Standing Committee on Energy (2021-22)-i project indang tongtibang mapatem mapang shitak nung renemtsü aser project indang unit ana (500 MW) August 2022 tashi nung lapoktsü ashi" ta NHPC CM AK Singh-i metetdaksü. Rajiv Ranjan-i anir Parliamentary panel-i iba project

sendangogo. Bodbarnü NHPC-i project team indang mapa aser maparen takok ngua inyakba ngua committee-i pelaba lemsatap. "Covid-19 ajanga timtem jenti adokdatsü yonga aser tzü metsüng agi maparen ajak thitemtsü yongjia Dam yangluba maparen renemtsü asoshi akok tashi inyakdar ta project executive director, Vipin Gupta-i Committee dang metetdaksü. 2010 küm All Assam Students' Union (AASU), Krishak Mukti Sangram Samiti (KMSS) aser TMPK densema anti-dam organization temi longkak aitba sülen iba project maparen anena liasü. Küm aika lir National Green Tribunal (NGT) nungi temelaba agir sülen ang October 15, 2019 nü iba project tenzükshia liasü. NHPC-i ashiba agi, NGT ajanga teyuba ama iba project dak sendakba nung maparen tongtibang kar melenshia inyakogo.

# Assam nung MLA tasen 5-i tezüngzüktep agiogo



**Guwahati, November 11, 2021 (Agencies):** BJP nungi shimba candidate tasen pungo aser külem teloktep UPPL MLA temi Brihostibarnü Assam Legislative Assembly indang züngsem ama parnok tezüngzüktep agiogo. Assam nung MLA 5 ya tawa by-election nung takok angurtem lir. MLA tasentem ya- Sushanta Borgohain, Rupjyoti Kurmi, Phanidhar Talukdar, Jiron Basumatary aser Jolen Daimary nung lir aser tanü Assam Assembly speaker Biswajit Daimary ajanga tezüngzüktep agidaksü. Assam By-election nung BJP aser UPPL nati menden

ajunga (5) nung takok angu. Thowra assembly constituency nungi BJP candidate Sushanta Borgohain-i takok angu, BJP candidate Phanidhar Talukdar-i Bhabanipur menden aser Rupjyoti Kurmi-i Mariani menden nung takok angu. BJP indang teloktep nung adener UPPL candidate Jiron Basumatary-i Gossaigaon aser Jolen Daimary-i Tamulpur constituency nungi takok angu. Gossaigaon indang BPF MLA aser Tamulpur constituency nungi UPPL MLA Covid-19 agi asüba aser Thowra, Mariani aser Bhabanipur nungi MLA tem BJP nung adenba ajanga by-election agia liasü.

# Lakhimpur nungi kinungtsü asütsü shibelenertem apu

**North Lakhimpur, November 11, 2021 (Agencies):** Lakhimpur police-i telok ka teyari agia North Lakhimpur nung kinungtsü shibelenba maparen atema tetsür asem aser tebur ana puogo. Nisung anaji Amit Kumar Shikwal (22) aser Mangilal Shikwal (28) na ta jangjaogo Tenaprong ya Rajasthan kübok Bikaner district nungi lir aser Lakhimpur nungi Rajasthan-i tetsürtem kiyimtsü atema anir aotsü atema aruba liasü. Osang tejangja ka angazükba sülen police-i Lakhimpur nung aliba Ganesh Mandir nungi Rajasthan nung ana den tetsür 3 apu.

Lakhimpur police-isa Lakhimpur nungi Rajasthan-i tetsür anir aotsü atema tongtepratepba atema Jyostna Banu (30) apu. Jyostna ya Chaprigaon nung alir aser la ya taoba mapang kiyimtsü atema shibelener ka liasü saka tangbo iba mapa nung agent ka ama inyaker. Tesüiba küm ishika Lakhimpur district nung tezülen aliba tesentem nungi tanur tetsürtem Rajasthan aser North West India nung kiyimtsü atema anir aoba osang lir. Nisung shibelenertem local agents kar anir tezülen aliba tesentem nung tanur tetsürtem bushia senzür.

**GOVERNMENT OF NAGALAND**  
**DIRECTORATE OF TECHNICAL EDUCATION**  
**NAGALAND: KOHIMA**

**NO.DTE/ESTT-2/12/2018-19/**      **Dated, Kohima the 10th November, 2021**

**NOTIFICATION**

In continuation of this office Notification of even Number Dated 22nd September, 2021, it is to inform that, the last date for submission of NEET(UG) 2021 filled application form along with NEET Score Card and required documents by hand to the undersigned has been extended upto 17th November 2021, 5 Pm.No form shall be entertained thereafter.

**(Er.M.NAKRO)**  
**Additional Director &HoD.**

**Issued by DIPR**



## TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜ (NOVEMBER) 12, 2021

### Hornbill benjong temong ta ashir asü?

**N**agaland nung Naga kintemi amongba benjongtem rongnung benjong tulutiba Hornbill benjong, Kisama nung amongtsü hopta asem dang lia, yashinep Yangtepnü (Thursday) anepdang mesangwai lia asenok Aor ki meshimeshia rongdokbaji, atangji, alima nung kodanga matalokdangba tesüngmangtsü mapa ka atalokerbo masü saka yangji asenok asoshi Tsüngremi nungi aruba osang kar lir asü ta jet ta temulungjangi arur. Ibaji akhidang, Babylon lima Belshazzar chuba tsüngdang jara nung teka ka adoker zülua sayuba ama asenok dang sayur asü ta bilemloka bilemer. Alima tsütsü kodang bilemdangdir, kin ka mera ki ka yanglua ayuba rongdokbaji takoksa tulu aser tesasatsüka saka nungdakra manger sangwa nung asenoki iba dang nung jagi tuluba aser tajungba yanglutettsü. Ajisüaka, kodang asenoki tanü Nagaland jenjang aser asen kin tia indang bilemdangdir, asenok pelatepa benjong amongtsüsabo masüba tensa ka nung lir. Tang ya ano Covid-19 tashidak mesüshima, anungji ano khen talila kümdangshitsüba mapang lir. Ano, ajak atema tebilemtsüji tang ya government mapa inyakertema ita sen-a mangu timtemba mapang lir. Ano külen, talisa asenok Aortem dangi Yisu temeim osang tajung arur küm 150 ajungbamong amongtsü renemba mapang lir. Iba ama mapang ka nung, Khristan lima nung Khristan-tem benjong amonger memesük yi jema japujaria longsutepa benjong amongtsübaji Tsüngrem tsüngdang ngasangatempa aser sensakertem mezüngmeshiba mapa ka asütsü. Tang ya Nagaland government-i Nagaland nung yi meyanglutsü aser mayoktsü ozüng lateta aliba salanüba mapang ka lir. Atangji, Nagaland nung yi yanglutsü aser ayoktsü melatsüla ta asüba kuli aika agüja lir aser item rongnung kuli tejangja kaji, Nagaland nung yi meyanglutsü aser mayoktsü ozüng zünga aliyonga Hornbill benjong amongdang Kisama nung yi talubo angur aser hopta ka benjong amongdang yi litre meyirijang aika ayoker. Iba jagi tayokertembo senotsü tajangzük angur. Ibayongji, Nagaland nung yi yanglua ayoktsü nungdakba kuli tajung ka angur. Ajisüaka, iba ama benjong nung asenoka tangar den kasasa mezübelanga, Kisama nungbo Tsüngrema mali ama aser Khristan-a masü ama, amongnü aser akhi nü kecha tebandang maka memongdaksüner asütsüa akok. Alima nung alir meimchirtem dang Tsüngrem jashiba sayudang, tzü gi aser mi agi meshimeshia samatsüba asenoki Laishiba otsütem azünger. Naga nungertem ya benjong sapuba kintem lir, anungji kechiba benjong mamongtsü? Ajisüaka, asenoki angatettsüba kaji, akhi nungi monga aruba Naga kintem benjong ajak ya Tsüngrem nem tenüngsang agütsüba aser Tsüngrem dang temoatsü meshia amongba benjongtem lir. Aji oda, iba tangatetba nung tanü tendak asenoki benjongtem rongnung tulutiba benjong yanglua amongba mapang yaa Tsüngrem tashi aser taochi bilemteta amongba benjong ka asütsüla. Atangji, Hornbill benjong yagi alimai Naga nung sobaliba tali metetogo aser Hornbill benjong nung Naga nung aika senotsü ajangzük. Taküm 2021 kuma alima tensa mejungaka bendang lima balala nungi raliwalirtem arutsü osang lir aser taoba kümtem nung ama, taküm kuma Naga nungertem aika maparen tapu balala nungi hornbill benjong aliba ajanga senotsü ajangzüksü imlar. Ajisüaka, tangar bendang semer nungi adenshia yur, Kisama yabo Nagaland nunga masü ama temesepba chiyongtsü aser japujari mapatem agi Naga kin mera maket akümtsüsa mongtetra, iba tenüng tamajungjibo Kisama nung hornbill benjongmong nung aaba sen agibo memenoktetsü. Atangji, alima nung ajak dang tajungtibaji tenüng tajung ngutetba taküm aser loktiji lir. Aji oda, asenokbo samanir kin asünungji, Naga nung ajak atema tenüng tajung alangtetsü merangtsüba dak alaka, senotsü ajangzükü dang Nagaland topur raksatsüsa asenoki meinyaktsüla aser benjonga mamongtsüla. Kisamaji japujaridak masü saka Tsüngrem temeim bilemteta sobaliba nung asentenshia benjong amongdak tesem tajung ka asütsüla. Tsüngrem tsüngdang asenok pelatepa yar tsüngsanga benjong amongbaji tai masütsü saka asenok achiajem aser shi azü mazüokteti inyakba mapatemjiang Tsüngrem tsüngdang tesempatsüka asütsü. Aji oda, asenok asoshi tali kümdangtsü nungdakba mapa kaji, kechi benjong mongdir mongaka, asenok pelatepbaji dang masü saka Tsüngrem peladaksüba benjongmong asütsü tim. Aji mesüra asenoki inyakba mapa aser asenok taküm rongsen ajak aut aser mitsü akümtsü. Iba tangatetba nung Kisama nung amongba Hornbill benjongmong ya, mongdi süra, limapur benjong masü saka arogo nungertemi amongba benjong ka kümdaktsütsüla.

## OLEMSABANG

### AROK AJUNGTSÜ ATEMA MEBENSEMI DANG BILEMDANGTSÜ OLEN KAR

~ Dr. Imti John, H.O. Dimapur, Nagaland

Nagaland Freedom Movement tenzüker 1970's tashibo pei kin Nejiso asoshi kecha menükshi-i ochi nung tasü eita India talenba kübok malitsü nokdak. Iba ochi tongpang rara ajanga Naga nung dak Nokinket (heroic) aser telongjem shisatsü ajiteta, Nagaland/Naga nung ya India rangpen asoshi kanga tasü tait aser tongtipang 'Kin' ta India-i angateta aser nukshia, kodang-a aser kechasüdang-a la (India) den mebiladaksüi külemisa linebayong asen takhangba (demands) ajak agizüka "Pangzüng/Meyongnem" (Agreement) Süsümedema yur India nung "Nagaland" ya Independent Statehood jenjang nung lia arudagi. Asenoki "Nagaland Statehood" ya melamelaa ngutetba ama kanga pungparabo (lightly) mebilemtsüla. Asenoki dang meseblebi amshitetra "Statehood Agreement" nung ya asen nungdak ajak peria keta lirko. Ano iba dang temaba jenjang Tsüngremer sendong nung lir-mali Pa dang asüngdanga, ajemalua inyakdi.

Asen lennir/tzürabur- Wabong, Late Dr. Imkongliba Longkumer (President, NPC) aser tanü tashi anüngzüka, Tsüngremi taküm tajung wazüka tokja alisang wabong, S. Chubatoshi Jamir (Naga nung kin tabensa nebu tetemjen medemteber) parnok lennisüba nung Naga nung India kokja kokogo. Item tatalokba ajak ya Tsüngremi asen Naga nung pukem nung India nung tasü beletdaksüba angateter.

Iba "Nagaland for Christ" ya India nung tetsüng-teben mesüra tepen (tali) masü saka tekolak (head) südaktsütsü Tsüngremer sendong ka lir ta kü lanua mapang nungi tangatetba, aser aji oda, ni lanua-1966, Dr. Clark Memorial High School, Impur nung Class VII azüngdang, aser iba mapang Impur Baptist Arogo nung temeshi nisung tsürabur- Late. Rev. Temjennüngsang, Sanneker alidang kü taküm nung Khrista agizüka baptised asü. Iba küm (1966) nungi tenzüka "Nagaland for Christ" ya India nung langka kalen nungibosa tekolak (head) asütsü taküm ajonga bendanga agüja nokdaker. Arungma, Sensor ajaki Yaritebdikor.

1980 tashibo Educated nisungtemi Naga lima/ Naga nung tejakleni aotsü lenmang sayu. Saka tanübo Educated nisungtem: MLAs, Ministers, Govt. Officials-temi kangasa mapayui raremdaktsüdag aser tim masüba lenrü leni anidaki! Sen agi teyazü Certificate alizüka bener; Sen aika bendena yur; oshi (language) aika angazüka bener; mesayuba chir, ano sayu machi; mezübelang zü (adulterated blood) ajanga sotetba; yimden-yimli memetet; sobaliba nung meinet; kin-kidong masüngtet; ano karbo Govt. Service nung alidang bülebzüka rongsen bendena yur Yimsüsüba menden agi raktepba; Rongsen (Patriotism masü materialism) dang angatetba; Central ruling party Govt. dak nepok/metalok nung dang Naga lima tejakleni otetsü ta angatetba; item amala yimsüsürtem (nisungtem) jagi asen lima kobi meli-i terra (root) dena meküba laodaktsütsü ta mangateti tanü ajung asaa item lennirtem sülen anidakertem ken mechioker bilemdanga atasatebangma. Asen Naga lima laoji-laojia odarji! Takaba aser temetetba kisüng jagi masüako! Tangatetba dangi meyipdi. Tiyazü aser tashi-em telok balala sülen anitakba ojang sütini! Teyazü agi ochi/shitak masüka yanglutep-ba ya melenshidi.

Akidangbo Theology mazüngertem süaka Tsüngrem O kanga junga angatetertemi khristar Arogo/Mongdangtem temenungratsüka aser akhüm keta tensa tamajung jentisa-jenti kokteta bener aru. Saka tanübo tangari zülua toktsüba Theological knowledge/degree aika sebtana apenertemi aser Khristar Arogo/ Mongdangtem nung lenir aikati Yisu Khrista aser pei Santem dang nungibo 'Rongsen aser Menden' (position/ status/ materialism) ang tesapuba aser temeimba kümadoker neburtem/ santem petsaperongdaksür aser item amala len-nirtem jagi süsü-süsü a (kecha tai mali amai dang) shitak mesükba lenmang jagi anidaki!

Tib kelenbo, kangasa mulungchitsü ka ji; theology azüngertem, Arogo/ Mongdang aser Institution balala aser Minsitry balala nung inyakertem kar-bo Tzübo tulu nung tzü menena aliba merüktetsü merangba "Tzümerüksü shiruru" amai kangasa bülemtebdarko. Parnokjibo neburtemi kagna akhüm keta aser meima bilemtsüdarko. Sang ni! Neburtem nenok den lirko. Kodanga tezü tanga teli ni! Wadang Kibur-i nenok dang kanga peladarko. "Temeshipur-bo semchisemnur tashi ayawara nungi-a kümsüktsü asen Tsüngremi asenok dang nangzüka lirji. Pai-bo kodang-a meyazürako-iba rongsenji nenok meyong.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Haiti nung apuba America nunger missionary ajak taküm lir



Haiti yimtiba, Port-au-Prince kübok Titanyen yimdaklirtemi America nunger missionary tem chiokang, ta takhangba agüja longkak aitba noksa nung angur.

**November 11, 2021:** Haiti linük nung October ita tomten 400 Mawozo teloki apuba America nunger missionary 17 tang tashi taküm aliba jangjaogo, ta US ketdangser kati metetdaksü.

Missionary 17 rongnungji America nunger 16 aser Canada nunger ka lir aser parnok ajak Ohio nung amenoka aliba Christian Aid Ministries nung inyaker.

October 16 nü parnoki orphanage ka semdangba sülen meyipa aoba mapang apu. Missionary tem den densema aliba tanur pongua apu.

Hombarnü (November 8) Christian Aid Ministries-i sangdong ka ajanga, "Parnok apuba sülen joko anogo 24buba jungogo, aser tang tashi parnok Haiti nung pua lir. Onok den sorkar ketdangsertemi parnok kümzüka kidangi anir arutsü atema maneni kanga meranga inyakdar. Ibaji onoki aginer saka onoki Tsüngremer sentong aser Tsüngremer mapang nung ai-aura akatsü," ta metetdaksü.

"Tang pua aliba kinüngertemi anogo aika parnok atema osang yongyaa atar aser pua alirtemia parnok kodang chioktsü ta yongyar. Nenok sarasadem

ajanga kinüngertem tasü aiter aser teimla akar. Maneni sarasademjang," ta Christian Aid Ministries-i mepishia metetdaksü.

Tawa 400 Mawozo telok nung tongti lenir, Wilson Joseph-i, parnoki akhangba ama sen magütsüra missionary ajak khasetsü, ta amokmerenogo. Parnoki missionary tem chioktsü atema missionary shia dollar sen million kaka akhanger.

October ita tetenzüklena Haiti nung Haitian-American nunger pastor ka pua liasü saka sen agütsüba sülen pabo chiokogo.

## ANOGO ABEN TSÜNGREM DEN

### Tongpang rara mesüra tazüokba?

*Kechiaser Kibubai shiba dang meimer pa merenshir aser Pai agizükba techir ajak dak azüker. Ibr 12:6.*

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agientsü aikati Tsüngrem dang asüngdang. Parnok timtem tebilemstüji Satan mesüra tanelaren kechi prok aji arur (Gal. 6:7) ta agizükdang nungibo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatetsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaktsütsü akok. Na tenzük nung ochi meshira na melenshitsu asoshi iba nungi adokbaji nai agidaktsütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nungdak temelenshi adokdaktsütsü asoshi Tsüngremi na azüoker. Ne tebilemstütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritetsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüktsü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

## Pope-i India semdangra Khristantem reshikangshiba anentsü imlar

**November 11, 2021:** Tawa Vatican nung Pope Francis aser India Ato kilonser, Narendra Modi na senden amenba aser Modi-i Pope dang India semdangtsü asüngdangba ajanga India nung Khristantem tarutsü nung Pope-i India semdangtsü aser ibaji ajanga linük nung religious freedom aliba den külemi Khristantem reshikangshiba ajema akümtsü imlar.

October 30, 2021 nü Pope aser Modi na senden amenba atema India nung Khristantem, talisa Catholic Khristantem pelar, ta Redemptorist Province of Majella nung Provincial Superior, Joseph Ivel Mendanha-i metetdaksü.

Interview ka nung jembidang Mendanha-i, lenir ana senden amenbaji India nung Khristantem atema temaitsü tajung ka lir; iba ya ajanga onok kanga pelar aser tepela agi tenük nung nüktzü atsünger, ta metetdaksü.

Pope Francis dak tepuatsü lir, aser pa ajurur ajak, talisa sorkar tekolakpurtem kongshir, anungji Modi melunga kongshir alitsüa akok, ta paisa ashi.

India Ato kilonser kati tesüsabuba Pope ajurubaji 2000 küm Vatican nung taoba mapang India Ato kilonser, Atal Bihari Vajpayee-i Pope John Paul II ajuruba liasü.

Tawa Pope Francis aser Modi na minute 50 shi senden mena liasü aser iba senden nungji



1999 küm November 5 nü Pope John Paul II-i India semdangba mapang Union Minister kati pa agizükba noksa nung angur.

tenati Holy See aser India tsüngda tesendaktep atema jembia.

Narendra Modi G20 lenirtem senden nung adentsü atema Rome-i aoba sülen pai Pope ajuru. Climate Change atema COP26 senden ya United Nations-i October 31 nungi November 12 tashi ayongzük. Pope Francis-a climate summit nung adentsü sentong liasü saka pai pa melen Cardinal Pietro Parolin dang yok.

Indian Foreign Ministry-i, Pope-i tekara nung India semdangtsü imlar, ta metetdaksüogo.

Vatican ketdangsertemi ashiba agi, Pope Francis-i India semdangnuba aiben jembia aruogo saka tang tashi nungbo pai India semdangtsü melemtet, ta metetdaksü.

2017 küm India nung Khristan putirtemi India semdangtsü atema Pope jaoka liasü, ajisüaka pa sentong balala

nung mazüngi aliba agi mesemdang.

Nütsüng billion 1.3 aliba linük nung Khristan nütsüng shilem 2.3 dang lir, aser Catholic Khristan nütsüng shilem 1.5 shi lir.

1964 küm mezüng Pope Paul VI-i India semdanga Mumbai nung ayongzükba International Eucharistic Congress nung aden aser 1986/1999 küm Pope John Paul II-i India semdanga liasü anungji India semdang Pope tasembubaji Francis asütsü.

Mendanha-i ashiba agi, Paul VI-i India semdangba mapang nung Khristantem dang sensakertem aser talidak malirtem yaritsü ajungshia lir.

2021 küm India nung Khristantem anema inyakba kanga bulua kümogo; taküm January nungi September ita tashi nung India nung Khristantem anema inyakba tatalokba 300 dak tema liasü.

India kübok state aika nung

anti conversion ozüng benokba sülen iba ozüng nung ajemdaker Khristantem anema inyaker; tang tesüsa Karnataka state nunga sorkari Anti-Conversion Bill benoktsü tebilemba lir.

Mendanha-i, Pope Francis-i India semdangba ajanga India nung Hindu nunger aser Khristantem tsüngda tesendaktep junga akümtsü imlar, ta ashi.

Pope Francis-i India semdangtsü süra tang mapang ya lir, ta pai ashi.

"Pope Francis-i sensakertem, tashi maitertem aser alima den tesendaktep tajung ayur aser nüburtem tsüngda apu alatsü aser tebilemstü onük balala bentetsü atema pai janrar. Onok Catholic Khristantem ibaji aginer," ta pai ashi.

India nung coronavirus wara tamajungba mapang nung Khristan charities aser

organizations-i shirangertem aser timtemertem yaria aruogo.

"Khristantem mapa tajung inyakbaji ozü sorkari dang masü saka lokti balala ajaki jangjaogo," ta Mendanha-i ashi.

The Examiner managing editor, Joshan Leslie Rodrigues-i, Pope-i India semdangba ajanga Khristan lanurtem ajungmesotsü, kechiyong parnok aikati Pope ka danga mengudang, ta ashi.

"Yimsü meyipdaksüba nung ajemdaker Khristantem anema inyakba tatalokba aika lir aser Khristan nütsüng kanga arener, ta prokba osangji tai," ta Rodrigues-i ashi.

Paisa, "Pope Francis-i India semdangba ajanga Khristantem anema inyakba ajema akümtsü, India nung Arogoi mapa tajung inyakba jungkai adoktsü aser lanurtemi Khristan yimsü ajungba jangjatsü," ta metetdaksü.

Vatican nung Ato kilonser, Modi-i Pope ajuruba mapang tenati coronavirus wara, sensak tia anema raratsü aser climate change tebilemstü onüktem nung lemtepa liasü.

Modi-i Pope nem taribi agi yangluba milen ka aser kakat ka sempet agütsü aser Pope-ia Modi nem yongmen yin agi yangluba 'plaque' ka agütsü; iba nungji "The desert will become a garden" ta zülua lir. Iba dak alia Pope-i Modi nem World Day of Peace nü pai jembiba onük aser Human Fraternity document ka agütsü.

**OLONG PAITEP # 5994**

	1				2			3		4
5								6		
7			8							
								9		
		10								
11										12
					13					
					14					
15										
					16					

<b>TIPILEN</b>		<b>LANGTSÜNGLEN</b>	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

**OLONG PAITEP # 5993 TELANGZÜBA**

<b>TIPILEN :</b>	<b>LANGTSÜNGLEN :</b>
1. Aben, 4. Artsü, 7. Lisem, 8. Liwa,	1. Aruli, 3. Balala, 5. Suwar, 6. Belem,
9. Sarasadem, 12. Aket, 14. Mangu,	9. Süjak, 10. Aonung, 11. Dokan,
15. Anünü, 16. Ango.	13. Tinu.



**ASEN YIMTSÜNG NUNG TSÜRATURTEM PEI CHIRNUR AZÜOKTSÜ ATEMA YIM MUNG DANG AMUNG NUNG KODA SÜLA?**

**Kiyonger 1** : Hoi nenok ajak jung dang lir ma? Oda talangkasa majurudanger atu, aser ner dangia yimsüsür karbo arudanger na?

**Kiyonger 2** : Hai oda onoka tanü tashibo ajak junga dang lir ako. Haujatu tanep ya ozü kinunger ajak menteba lia asen yimer yimsüsür kar arua oda asen yimtsüng nung lanurtem libaliro ajak nung kümdangshia mepetmesü meleli liromedema tali longjemshia alitsü mechi nung asüng asen yimtsüng nung tsüraturtem ajak nung yimteni chiyongdakja mung dang ka ayongzüka linür ta shia aruaja.

**Kiyonger 1** : Hauni tanep ner dangi yimsüsür kar arua ashibaji oda aseni khen bilemsü agibo oda parnokia asen yimtsüng nung talisa lanurtemji kangasa aria bilema jungdaksünua ali sülaba, saka oda ni ashitsü agibo asen yimtsüng nung lanurtemji libaliro ajak nung azüoka alitsü atema sayubentsü agüja yimer yimden senbong nungi khuret süa mung dang amungtsü melenbo oda asen yimtsüng nung kibong shia pei kilong nung tanurtem dang pei tsürapuri akok tashi sayubentsü tajung agüja litet nungbo yimden mapang intoka mungdanga mamung nunga kecha balaka mali ta nibo bilemer.

**Kiyonger 2** : Haujatu, oda nai ashiba ama tanurtem tsürapuri anogo toklana mungdanga mungaka aji senshir pei kidangi oa tanurtem den sayubentsü agütsütsü memetetra item ajakji tsürung nung ken tentok ama dang akümtsü.

Lilir : S. Repa Pongener, Mon Bosti, Assam.

**TANÜBO NAI LANGZÜANG**

Q. Linük koba ajanga 'gay rights activist', Harvey Milk nungtem nung rong ka saya?

[A] Russia [B] USA [C] Germany [D] Norway

(Taruba adok nung onoki langzüsü)

**YASHI ADOK TELANGZÜBA** : Kerala

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Lensar**  
(n) lenmang tasen lepboka aoer (pathfinder)  
\* **Lensar** sülen yimkong anidaka alu leni ao.

**Lenset**  
(v) leneter südaktsü (strangle)  
\* US police-i George Floyd **lenseta** südaktsü.

**Happy Birthday**

**TENÜNG : AREMJEN (LONGSA)**  
Küm : 1  
Anogo : Nov. 12  
Talidak : Aoyimti

Temeim jala Jenjen, Na tasoba anogo nungi tanü küm ka ajungba anogo tashi Tsüngremi arishi aser taküm moatsüba atema Tsüngrem tenüng asanger.  
Ano arishi anema aliba temoatsü meshia sarasademtsür.  
Happy birthday Jenjen.

- Oba, Oja aser Kinungertem

**NAI-A YA METETTER MA**

**ELECTRIC GARI SAPUA AMSHIBA LINÜK KAR:**

1. NORWAY	(74.8%)	10. LUXEMBOURG	(11.4%)
2. ICELAND	(45%)	11. FRANCE	(11.3%)
3. SWEDEN	(32.2%)	12. BELGIUM	(10.7%)
4. NETHERLANDS	(24.9%)	13. UK	(10.7%)
5. FINLAND	(18.1%)	14. AUSTRIA	(9.5%)
6. DENMARK	(16.4%)	15. IRELAND	(7.4%)
7. SWITZERLAND	(14.3%)	16. CHINA	(6.2%)
8. PORTUGAL	(13.5%)	17. US	(2.3%)
9. GERMANY	(13.5%)		

**SUDOKU # 6035**

	2		6			1	8	
4	6		2		8	3		
8	5		3	7	1	4		2
			4		2	7	3	
6		2	1	3	5			4
		8	7		9			1
	3			1		2	7	
	1	6	8					
2					3			5

**TELANGZUBA # 6034**

	6	2	9	5	1	7	8	4	3
1	5	8	9	3	4	6	2	7	
3	4	7	8	2	6	1	9	5	
	9	3	4	7	6	2	5	1	8
2	8	1	3	5	9	4	7	6	
	7	6	5	1	4	8	2	3	9
	4	9	3	2	8	5	7	6	1
	5	7	2	6	9	1	3	8	4
8	1	6	4	7	3	9	5	2	

**OJANG LUTEP # 5581**

NGTAAR :

MTTIEM :

ERAS :

UREKHT :

ETEMEMTI :

NOPARK :

ENYKHONGI :

ÜTSAITSÜ :

GDANÜNK :

OKEMADR :

**OJANG LUTEP TELANGZÜBA # 5580**

KONANG NÜNGSANG TANG MASÜ TIMTEM  
TEKANGSHI AGIA LOKTI TENZÜKBAJIANG TEMOATSÜ

**TAN HOPTA ATEMA - KOMA SÜLA ?**

Q. Akhidang ama, ABAM kübok lanurtem ya küm shia lanur mung dang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?



November 11, 2021 nü Chennai nung tzünglu kanga aruba sülen Chennai Airport nung tzü metsünga alidak tayimtsü ka anena aliba noksa nung angur. Tsüngsang-mopung majungba ajanga Chennai airport nungi senzüba tayimtsü service ajak anenogo.

### SC-i tentetba committee den sorkari yariteptsü: Vaishnaw

**New Delhi, November 11 (Agencies):** Pegasus ken o bushisüngdangtsü atema Supreme Court-i tentetba mongin committee den Centre sorkari yariteptsü, ta Brihostibarnü IT & Communications Minister, Ashwini Vaishnaw-i metetdaksü.

Minister-isa, bushisüngdangba nung yariteptsü atema sorkari committee nem infrastructure, nübo, laboratory facilities aser osangtsüsang agütsütsü, ta metetdaksü.

Social media regulations dak sendakba nung Union Minister-i, nüburtemi pei tebilemba lemsateptsü atema social media sabang balalai maongka agütsür, ajüsüka technology tim masüba nung amshiba ajanga khuret tulu bener arutsür, anungji iba dak sendakba nung ozüngtem yanglushitsüsa akümer, ta metetdaksü.

"Times Now Summit 2021" sentong nung jembidang Vaishnaw-i, nija khuret aser lokti khuret na nungji tetsüngda alitsüla, ta ashi.

"Mezüngbuba nung, pei sasa social media timi amshitsüla, tanabuba nung social media amshirtemi pei sasa ozüng yanglua benshitsüla aser tasembuba nung sorkari tiyongtsüi aittsüla. Iba nungji ajemdaker social media aser ozüngtem yanglutsü, saka tamshirtem tongtibangba

südaksütsü," ta pai atema züngsem aseme akümba mongin committee ka tenteta liasü. India nung yimtenren lenirtem, opposition lenirtem, osangbenertem aser tongtibang sensotem itdangittsü atema Centre sorkar agency temi Israel nung Pegasus spyware amshio, ta tai tonglokja aliba ken o bushisüngdangtsü atema taoba mapang Supreme Court judge ka leniba nung committee ka tentet.

Taküm küm tetenzüklen India sorkari IT intermediary ozüng tasen yangluogo aser ibaji Twitter aser Facebook densema technology company tulutem nem pei khuret angatetdaksütsü nükjidong nung inyak.

India nung itdangittsü atema sorkari Israel nung spyware Pegasus amshio, ta tai tonglokja aliba dak sendakba nung Vaishnaw-i, sorkari Supreme Court oshidangji akhümtsübur, ta ashi.

Supreme Court-i tentetba committee nungji technical mongintem lir, saka sorkaria akokba tashi iba committee yaria nüngdakba infrastructure, nübor, laboratory facilities aser osangtsüsang agütsütsü, ta pai metetdaksü.

"Onoki aibelenali mali (sorkari Pegasus mamshi), anungji committee report atema onok shisabulutsü menüngdak," ta pai ashi.

Sorkar indang agency kati danga Pegasus malizük asü?, ta asüngdangba langzüdang Vaishnaw-i, "Onoki ozüng kübok dang inyaker, ta ni Parliament nunga jangja-jangja shio, aser linük nung Supreme Court-i ozüngtem benoker. Onok ozüng kübok lir," ta ashi.

Taoba ita Supreme Court-i Pegasus ken bushisüngdangtsü

atema züngsem aseme akümba mongin committee ka tenteta liasü. India nung yimtenren lenirtem, opposition lenirtem, osangbenertem aser tongtibang sensotem itdangittsü atema Centre sorkar agency temi Israel nung Pegasus spyware amshio, ta tai tonglokja aliba ken o bushisüngdangtsü atema taoba mapang Supreme Court judge ka leniba nung committee ka tentet.

"Pegasus mangatetep ken o ochi jungkai adoktsü atema iba committee tenteter," ta SC-i metetdakja liasü.

Iba committee nung tekolakji taoba mapang SC judge, RV Raveendran asütsü aser tanüngba züngsem anaji Alok Joshi aser Sandeep Oberoi na lir.

Pegasus ken o dak sendakba nung Centre-i onok melung asütsüsa telangzüba magütsü, ibayongji court-i mongin committee ka tentetsüsa aküm, ta SC-isa metetdaksü. Court-i Centre dang iba ken o nung amalitepa inyaktsü asüngdanga liasü saka Centre-i affidavit nung melungsüa telangzüba magütsü, ta Court-i ashi.

"Linük security nung ajemdaker sorkar paidoktsü makok aser sensotem temeden anema inyakba ken o lia court-i ola madoki yutsütsü makok," ta SC-i metetdaksü.

## December 6 nü Russia Tir, Vladimir Putin-i India semdangtsü

**New Delhi, November 11 (Agencies):** December 6, 2021 nü Russia Tir, Vladimir Putin-i India semdangtsü aser linük ana tsüngda senden nung shilem agitsü.

Russia Tiri anogo ka India semdangba mapang Delhi nung Ato kilonser, Narendra Modi den senden amentsü aser pai semdangba mapang linük ana tsüngda tezüngzüktep aika agitsü imlar.

Putin-i tesüsabuba India semdangbaji 2018 küm liasü aser iba mapang nungjia linük ana tsüngda senden amen. 2018 küm pai India semdangba mapang India aser Russia tsüngda S400 system alizüktsü atema tezüngzüktep agi, aser taküm küm tatembanglen S400 mezüngbuba shilem India tonga arutsü.

Taküm Russia Tiri bendang linük ka (US) dang semdanga liasü aser iba mapang nungji pai Geneva nung US Tir Joe Biden den senden amen. Anungji taküm pai bendang linük tanabuba semdangbaji India asütsü.

Yakümbo coronavirus wara aliba ajanga India-Russia senden thina liasü. Tang tashi nung India aser Russia na nung

melentepa linük ana tsüngda senden 20 ben menogo.

2019 küm India-Russia senden nung adentsü atema Ato kilonser Modi-i Russia kübok Vladivostok yimti semdang aser iba mapang nungji 5buba Eastern Economic forum nunga pa tetushi tejaoker liasü.

India-Russia senden nung coronavirus wara tongti onük ser jembitsü. Tang India nung Russia nung Sputnik V vaccine yangludar aser India nung wara tamajungtiba mapang nunga Russia-i India nem teyari agüja liasü.

Linük anapronglai Afghanistan atema tebilemstü akar, aser taküm Taliban teloki Afghanistan agiba sülen-a Russia National Security Advisor (Secretary of the Security Council), Nikolai P. Patrushev-ibo Delhi anaben semdanga Afghan tensa atema o lemtepogo.

India aser Russia tsüngda tongti tesendaktepji defence sector nung lir. Linük ana tsüngda project tulutem rongnung 1135.6 Frigates, India nung yangluba assault rifle - AK-203, Su-30 MKI den MiG-29s aser MANGO ammunition & VSHORAD systems densema lir.



Karad, November 11, 2021: Brihostibarnü Karad nung Maharashtra State Road Transport Corporation (MSRTC) nung inyakertemi MSRTC, sorkar den lokteptsü atema takhangba agüja kou ongdokba noksa nung angur.

## India nung ano nisung 13,091 dak Covid putet aser 340 asü

**New Delhi, Yimpoksüi/ November 11 (Agencies):** Tesüiba ghonda 24 tsüngda India linük nung ano nisung 13,091 dak coronavirus tashidak putetogo aser iba wara agi shiranger 340 asü; tang tashi nung iba wara agi linük nung nisung 462,189 tashi süogo, ta Brihostibarnü Union Health Ministry-i metetdaksü.

Tang tashi nung coronavirus vaccine dose crore 110 dak tema agütsüogo, aser iba nungji tesüiba ghonda 24 tsüngda dose lakh 57 agütsüba densema lir.

Tang linük nung coronavirus agi teshirangdakpur 1,38,556 dang kümogo aser ibaji tesüiba anogo 266 tsüngda shiranger tajemtiba lir.

Tang hopta shia coronavirus

positive putetba shilem 1.18 dang kümogo aser anogo shia positive putetba shilem 1.10 dang kümogo, ta Health Ministry-isa metetdaksü.

Yaküm March ita nungi tenzüka tang tashi nung coronavirus agi shiranger shilem 98.25 dak tema anepogo.

Tang tashi nung states aser Union territories nem vaccine dose crore 120 dak tema agütsüogo aser states/UTs ket nung vaccine dose crore 6.74 anünga lir, ta Ministry-isa metetdaksü.

Linük nung Covid-19 vaccination program kübok shilem tasenba nung Union sorkari India nung yangluba vaccine shilem 75 alizüka states aser UTs nem angati agütsür.



November 11, 2021 nü Jammu nung Shiv Sena Dogra Front nungi züngsemtemi Pakistan Ato kilonser, Imran Khan anema longkak aitiba noksa nung angur.



Seoul, South Korea indang Gimpo International Airport nung Urban Air Mobility services alidang Germany nung amenoka aliba company, Volocopter indang 2X air taxi ka test pilot Damian Hischier-i tendangba noksa nung angur.

### Aden bomb lendong ka nung Yemeni osangbener aser tanur asü

**Aden, Yimpoksüi/Nov. 11 (Agencies):** Yemen south tsütsü Aden yimti nung Yemeni osangbener ka indang gari nung tenük yoker bomb pokloktsüba lendong nung osangbener aser lar tanur ka asü, ta kettangsurtemi ashi. Iba lendong asoshi telok katia tenüng agia mali, koba Mongulbarnü ataloka liasü aser iba lendong bushisüngdangba mapang lir, ta kettangsurtemi ashi.

Rasha Abdullah al-Harazi indang gari nung improvised explosive device (IED) menaloker pokdaktsüba ya kiralongrar mapa, ta Ato Kilonser Maeen Abdulmalik Saeed-i aitsü. Iba lendong ya Aden kübok Khormaksar tesem nung al-Harazi aser lar kibong ya doctor ka dangi aoba mapang atalok, ta kettangsurtemi ashi.

Al-Harazi, shiba United Arab Emirates nung amenoka aliba Asharq satellite television channel atema inyaka liasü, la ya mashisa liasü. Iba lendong nung al-Harazi aser lar tanur Jawad asü aser la kinungbo aser osangbener Mahmoud al-Atmi kangasa mejungi yirua mozü kidang anepaluba mapang lir, ta kettangsurtemi ashi. Iba lendong nung süyi-sübonger asem yiru, ta ashi.

Tzükumlen aliba Aden yimti nung küm ishika tsüngta bomb lendong aika ataloka arur aser item lendong atalokba asoshi yangji al-Qaeda aser ISIL (ISIS) den sendaktepa aliba teloktem tenüng asener. Iran-i yariba Houthi telokia iba yimti nung ballistic missile aser tapoktsü oset aliba drone tem agi maka liasü.

Taoba ita Aden tezülen Khormaksar nung aliba international airport tezülen security checkpoint ka nung car bomb ka pokdakja nisung ti asü. Iba lendong asoshia telok katia tenüng agia mali. 2014 küm Houthis temi linük yimtiba, Sanaa agiba sülen Yemen nung civil war tenzüka sülen alimai agizükba Tir Abd-Rabbu Mansour Hadi indang sorkari ya Aden nung amenoka lir.

Saudi Arabia-i aniba coalition ya 2015 küm March ita rarai aodang United States-ia yaria liasü, shirnoki sorkar nem tashi tanaben agütsütsü merang. Tayimtsü amshia aser ali nung kanga sashia raraka iba tongpang nung mejetteta takok angur meliasü aser alima nung humanitarian crisis tamajungtiba adok.

### Taoba South Africa Tir FW De Klerk süogo

**Cape Town, Yimpoksüi/Nov. 11 (Agencies):** Taoba South Africa Tir, Frederik William de Klerk süogo, ta pa indang foundation ajanga ashi. Nisung tema tereprangtsü sentsü nung ajemdaker yimsü asüba kübok lenir tatembangba aser linük democracy dangi melenba nung pai tongti shilem agia liasü. Pa arishi küm 85 liasü.



"FW de Klerk ya mesothelioma cancer agi timtema aruba sülen Fresnaye nung par kidang tanep süngjema amozüka ao," ta FW de Klerk Foundation ajanga Brehostibarnü sangdong ka nung ashi. Linük nung temesung nisungtemi yimsü asüba nungi melenshiba sayatenya transition aniba atema 1993 küm De Klerk aser South Africa nung sentsü tanakrongnung tir mezüngbuba, Nelson Mandela na nem Nobel Peace Prize agüja liasü.

De Klerk-i pa dak iba tashidak aliba ya taküm March 18 nü pa küm 85 ajungba mapang sangdonga liasü. Pai kinungtsü Elita, tanur Jan aser susan aser semchirtem yutsür asü. "Asüpila sentong agitsüba maparen atema par kibongi mapangtung nung metetdaksütsü," ta foundation ajanga ashi. Mandela den külemi De Klerk-i South Africa nung temesung nisung ishikati yimsü asüba tatem kati arudaktsü. 1990 küm February ita pai

linük indang parliament nung jembidang apartheid nungi democracy dangi melentsü asoshi jembishinü tenzüka sangdonga liasü. Iba temelenshi ya ajanga African National Congress (ANC) aser danga anti-apartheid organisation tem nem tenokdangba agüja aliba agien, aser Mandela densema political prisoner tem pua aliba chiochtsü tashi agütsü. Iba yagi tasüba temerenshi agütsütsü mapang atsülangtsü mela. Pai parliament nung iba o jembibida ajanga segregation policy tem tatem kati arua jembishinü tenzüka South Africa nung ar janga atema kasa temeden aliba constitutional democracy tenzüka liasü. Pai iba o jembidang parliament züngsem karbo chamber yutsür ao. Anogo tuko lir Mandela tepuokdak nungi chioka liasü. Iba sülen küm pezü lir Mandela ya tir ka ama shimteta liasü, kechiaser Black South Africans temi idangji mezüngbuba vote agütsü.

### Pangzüng tasen ka agizüka Xi Jinping jenjang akangshir

**Beijung, Yimpoksüi/Nov. 11 (Agencies):** Chinese Communist Party ajanga "historical resolution" ka agizüka yimten yimsüsüba tsütsü Xi Jinping indang jenjang akangshir. Iba party küm 100 otsü zülua aliba kuli kakat ya ajanga parnoki takok anguba aser tarutsü lenmangtem indang shia lir. Ibai party tenzüker tasembuba ang alitsü, mezüngbuba ya Mao Zedong-i 1945 küm agizük aser tanabuba ya 1981 küm Deng Xiaoping-i agizüka liasü. Ibai Brehostibarnü plenary session trokbuba nung agizüka liasü, koba China nung yimten yimsüsür senden tongtipangtiba lir. China nung lenir tasenbubai dang iba amala pangzüng ya agizüker asünungji, Xi ya party tentetsang Mao aser pa melener Deng na den sako akumtsü. Iba pangzüng ya Deng kübok tenzüka China nung lenirtemi decentralisation asüba aser ano Jiang Zemin ama lenirtemi amshiba Xi-i melenshitsu merangba amai sayur, koba ajanga China ya akhi mapang amshiba yimsü dangi meyipa aotsü. Anogo pezü kishi shibanger amenba senden nungya züngsem 370 den ano party

indang 19th Central Committee nungi züngsemtem dena liasü. Taruba küm national congress alitsü lia party lenirtem senden tulu amenba ibai tasenba alitsü. Taruba küm national congress nung Xi Jinping yagi kümsük tasenbuba tir inyaktü asoshi merangtsü teimla lir. 2018 küm China nung tir küm ana inyakba kümsük agien, anungji Xi ya taküm tepiyong tir ka ama inyaktü maongka agütsür. Iba yagi Xi yimsüsüba jenjang tali akangshir, ta mongintemi BBC dang ashi. "China linük otsü nung pai pa ya 'hero' ka ama kumdaktsütsü meranger," ta Chinese current affairs indang newsletter, China Neican indang yimozülur, Adam Ni-i ashi. "Otsü yanglua pangzüng ka renemba ajanga pasasa pa ya Party otsü aser modern China nung tiyong südaktsür, Xi-i pa tashi sayur. Saka ano kuli kakat ya hadir ka ama amshia pai maneni yimsü asütsü," ta pai ashi. Tang tesüsa agiba mera yagu Xi ya taoba China lenurtem dang nungi balaka kumdaktsür, ta National University of Singapore nungi Dr Chong Ja Ian-i ashi. "Taoba mapang lenirtem, Hu Jintao aser Jiang Zemin nung dak Xi ama tashi meliasü.

Ajisüaka parnok nem kasa maongka agütsü asü magütsü, mesüra parnok dak tejangraba liasü asü masüar memetet," ta Dr Chong-i ashi. "Temetetba tangya nüburtemi Xi dang tali rangloka asadanga alitsü. Pa nem iba tashi agütsüba ya aikati repranga alitsü." Deng aser Mao nati taoba mapang pangzüng agizükba ya tesüiba mapang den tesendaktep rakdangtsü asoshi amshia liasü. 1945 küm party senden nung renemba pangzüng amshia Mao lenisüba nung tashi tali ajangtet aser iba yongji 1949 küm People's Republic of China tentetba indang sangdong dang pa dak tashi ajunga liasü.

1978 küm Deng ya lenir ka ama akumdang pai tanabuba pangzüng 1981 küm yanglu aser yangji pai 1966 nungi 1976 tashi Cultural Revolution aliba mapang Mao-i aibelenba aitsü, koba ajanga nisung million aika asü. Deng-i China indang rongsenketzüng temelenshi amendak dak yanglua liasü. Saka taoba pangzüngtem ama masü, Xi-i pa indang pangzüng maneni amshia aotsü atema temolung agütsür, ta Ni-i ashi. China ya aliba nung tashi tulu aliba linük ka akumba mapang Xi indang osang ya angashir, koba küm ishika tejkadang meshisadangteti liasü. "Tangbo linük rongsenketzüng, military ainba

asere alimai metetba meyipa reprangtsüsa jenjang nung lir, kong CCP aser lenirtem asoshi linük telungzüng nung parnok anemer shinga mali," ta Dr Chong-i ashi. "Lenmang aisü nung CCP nung Xi tekolakba sür party aser China ya takok tematiba nung lir." Ajisüaka yimtenren ya mamangtsüka asür, aser tarutsü nunga Xi ya lenir alitsü ama kuli ajungai sayuaka asenoki kechi ataloktsür memetet, ta mongintemi ashir. "China indang tematiba yimten yimsüsüba maparen asen nuk agi mangur, anungji asenoki memetetba aika lir," ta Ni-i ashi.



Cape Canaveral, Florida nung aliba Kennedy Space Center nungi Launch Pad 39-A alidaki aoba sülen NASA astronaut Tom Marshburn, tiyong, Operations and Checkout Building yutsür aoba noksa nung angur. Astronauts pezü SpaceX indang Crew-3 mission nung International Space Station-i atutsü lir.



## Zunheboto nung 'Citizens Good Road Campaign' tenzükogo



**Dimapur, Yimpoksüi/ November 11 (TYO):** Sumi Hoho-i achaayangba 'Citizens Good Road Campaign', Deputy Commissioner Zunheboto, Peter Lichamo-i November 9 nü Zungti yimtsüng junction nung tenzüksüogo.

Sentong nung o jembiba mapang Sumi Hoho tir Nikheto Jimomi-i, Sumi Hoho-i Sumi nungertem dang teyari tera agütsüba ajanga mapa tulu takok ngua inyaktetsü, ta tatishitsü ka sayuner, ta ashi. Paisa, nüburtemi telangzüba tajung agütsüogo aser iba project yagi kilometer 60 shi ayimjemsü aser parnok züngsem kari anir Kandiniu nungi mapa inyak tenzükogo, ta ashi.

Kasa mapang nung Sumi Kukami Hoho tir Kashito Yephthomi-i, Sumi Hoho tir aser külem lenirtem dang iba amala project ka benok inyakba atema parnok nem tenüngsang

## 'Pon Manickavel' November 19 nung sayatsü

**New Delhi, Yimpoksüi/ November 11, 2021 (Agencies):** Director A.C. Mugil Chellappan indang 'Pon Manickavel', kong actor Prabhu Deva aser Nivetha Pethuaraj nati tongti shilem agir, iba film November 19 nü Disney+ Hotstar nung sayatsü.

Bodhbarnü, iba film indang trailer ka sayaba mapang, film producer Nemichand Jhabak-i Twitter nung iba film sayatsü osang lemsatepa liasü.

"Iba film sayatsü asoshi kanga yongya arugo aser film nung Prabhu Deva-i police ka ama shilem agiba angutsü. Prabhu-i police ama film nung shilem agiba ya tang mezüng asütsü," ta pai ashi.

Ano, 'Pon Manickavel' ya Prabhu Deva indang film 50buba asütsü. Mezüngbo, Pon Manickavel' ya February 21, 2020 nung sayatsü renem aser maparen kar matemba ajanga March 6, 2020 nung sayatsü anogo atsülangtsü. Ajsüaka, Covid-19 tensa majungba ajanga film sayatsü anogo atsülangtsü liasü.

Taküm küm tetenzüklen, team-i iba film theatre melena OTT nungang sayatsü lemtet. Tang iba film sayatsü asoshi anogo lemtetogo (November 19). Iba film nung D. Imman ajanga music yanglutsüogo, cinematography tsütsü K.G. Venkatesh-i yariogo aser T. Shivanandeeswaran-i editing tsütsü nungitogo.

agütsü. Pai, Kandiniu lenmang ya Sumi nungertem dang masü saka ajak atema ta shia nisung ajak dang tejakdangi arua iba project atema teka amteper inyaksü ayongzük.

Yephthomi-i sentong nung dena aliba GB tem dang chiyongsü asüyonga agüja iba mapa nung teka amteper inyaksü atema iba osang ya yimtsüng balala GB tem metetdaksütsü ayongzük. Paisa, Deputy Commissioner Zunheboto, Peter Lichamo- teti teka amteper inyakba atema pa dang kanga pelaba lemsatepba den pa teyari nung iba lenmang ya black topping asütsü atema inyaksangshitetsü ta amangba lemsatep.

## Phek DPDB senden menogo

**Phek, Yimpoksüi/November 11, 2021 (TYO):** Bodhbarnü (10.11.2021) Deputy Commissioner aser vice chairman, DPDB Phek, Razouvolie Dozo akhüm nung DC's Conference Hall, Phek nung Phek District Planning and Development Board senden mena liasü, ta sangdong ajanga metetdaksü.

Iba senden nung Deputy Commissioner-i, HoDs ajaki pei pei staff vaccine agütsü asoshi ajungshitsüla, ta ashi. Phek district ya süngmok (ginger) aser elaichi (cardamom) adokba tesem ka ama sangdonger asünung, süngmok aser elaichi tsünütsü nüburtem ajungshitsü asoshi Dozo-i züngsemtem ayongzük.

S. Pethury Montessori School, Meluri upgrade asütsü aser Phoyisha Cultural Organization, Phor register asütsü atema teloki agizüka liasü. Iba den külemi senden agiba mapang Phor yimtsüng nung postal branch ka yanglutsü asoshi teloki agizük aser iba maparen atema tekolakpur dangi abentsü asoshi bangjemtep.

Sentong tenzüksüba mapang DC Lichamo-i, iba mapa tajung benoka inyakba atema Sumi Hoho nem tenüngsang agütsü. Paisa, Sumi nungeri dang masü saka tanga Naga kintemia iba tatishitsü tajung ya angazüka benshitsü imlaba lemsatep.

Maneni Dr. Vihuto Asumi-i, tenla agütsürtem ajak dang kanga pelaba lemsatep. Pai, church association SBAK Nito Mount aser SBAK Aizuto dang iba inyakyim nung shilem agütsü atema local Arogo tem ayongzükba atema kanga pelaba lemsatep.

Iba sentong ya General Secretary, Sumi Hoho, Dr Vihuto Asumi lenisüba nung agia liasü.

Pre - Christmas sentong agütsü asoshi telok olemtepa liasü aser iba sentong December 13 aser 18, December 2021 tsüngda agütsü lemtet.

ADC & Administrator, Phek Town Council, Phuleshe-i, mapang shitak nung sanitation fee agütsütsü aser pei pei aliba temeküt tesemtem merüktetta ayutsü asoshi dustbin tem amshitsü atema nübur dang metetdaksütsüla ta züngsemtem dang ashi.

CMO Phek, Khriezotuo Paphino-i, district nung nisung 600 dak corona tashidak putet aser iba tashidak indang tasüba shilem 2.98% liasü, ta ashi.

Paisa, züngsemtem dang pei pei office nung vaccination poster maloka ayutsü ajungshiogo.

Maneni, Agriculture, Tourism and Economics & Statistic dang taruba DPDB senden nung departmental inyakyimtem metetdaksütsü atema nungloktsüogo. Kasa senden nung, district level essay competition nung takok angur nem tenüngsang agütsüogo, kong Kheyeto Lohe-i takok ngua liasü.

## Menungra Bil eMteter



Lt. Imnakumla Longchar  
12th Nov. 2020

OJA,

*Nai onok toktsür oaka*

*Anogoshia na onok mulungjang nung teti lir*

*Nu temi aser sayutsüngi O tem*

*Nu sarasadem ola aser mapa tajungtem*

*Menungra bilemteter*

Temeim

**Kinungbu, Chirnur, Semchisemnur  
aser Kinungertem.**

## MOLONGNEN LEMSATEPER

ASO : 07/02/1924 - ASÜ : 04/11/2021  
Asür Sajunginla lemtutsür (Longmisa)

Temeim Ojala, akümlir nungi pilar onok mangyim jashi tia nung alidang nüburtem kwikati Ozü den sarasadem, nübo, rongsen, shisatsü agi yaritepogo nenok ajak dang Ozü kinungertemi kangasa palaba lemsateper.

Ajak takoksang Tsüngrem-i nenok ajak tali moajangma ta Ozü sarasadem.

**"Aochia bilemertem  
temoatsüba, kechiaser parnoki  
taochi angutsü"- Mathi 5:7**

~ Chirnur, Semchir aser Kinunger.



## PELABA LEMSATEPER

Nagaland nung taoba Chief Minister aser Governor, **Dr. S.C. Jamir** nem India Tir ajanga linük nung civilian award temaba rongnung tasembuba PADMA BHUSHAN konang agütsüba sülen Dimapur-i arudang airport nung tushia agizükba aser ano pa talidak Chumoukedima tashi meinoktsütsüsa sentong tulu ayongzüka agiba atema **Ao Senso Telongjem, Dimapur** dang pelaba lemsateper. Teküpoklen agüja aliba lokti tentettem dang onoki pelar aser nenoki shilem agiba atema tetushi agütsür.

1. Naga Council Dimapur
2. Nagaland GB Federation
3. CNTC
4. Western Sumi Hoho
5. Lotha Union
6. Ao Senso Telongjem Dimapur
7. Ao Senso Telongjem Chumoukedima
8. Ungma Council
9. Ungma Jamir Kidong (Clan)
10. Shri. Sharingain Longkumer , NLA Speaker
11. Dimapur Ao Lanur Telongjem
12. Watsu Telongjem Dimapur
13. Ao Kaketshir Dimapur
14. Chumoukedima tashi National Highway nung pelashishia agizükertem.

**Nenok ajak dang kangasa pelar.  
Dr. S.C. Jamir'er kinungertem.**

**DIMAPUR MISSION HIGHER SECONDARY SCHOOL**  
Churches Colony, Near City Tower, Dimapur  
Email: dmhssdim@gmail.com  
Web: www.dimapurmissionhrsecschool.com

### VACANCY

1. Science Teacher - B.Sc./M.Sc. : 1 Post, Preferably with B. Ed or D.El.Ed

Candidate(s) are invited to apply **on or before 26th November 2021** with full bio-data with all the academic documents starting from HSLC.

Application may be submitted either through online or physically at the given address.

**CHAIRMAN**  
School Governing Board,  
Dimapur Mission Hr. Sec. School

## Kohima District Open Volleyball Tournery osang



**Kohima, Yimpoksüi/ November 11, 2021 (TYO):** Anogo asem tashi ayongba - 8th Kohima District Open Volleyball Tournament 2021 ya November 12 (Hokolbar) nü Khuochiezie (Kohima Local Ground) nung tembangsü. Iba asayamung ya Kohima District Volleyball Association (KDVA) akhüm nung ayongzüka asayadar. Hokolbar nikongdang 3:00

ako meta iba asayamung shibangba sentong agitsü, kong N.Bhavani Sri, Additional Deputy Commissioner Kohima special guest ama jaoka lir. Iba sentong nung Victor Yhome menden asütsü aser Vizovoto Nagi-i tepela anküp o jembitsü. Kasa anogo anepdang 8:00 ako nungi tatembangbuba League round match tem

asayatsü. Item league match temer sülen, tetsür aser tebur atema semi-final aser final asayatsü.

### \* Men's matches:

1. Kiruphema YO vs Dazzling Phesama
2. TKK Jotsoma vs CB Veteran Kiruphema

### \* Women's matches:

1. Mystic Club vs Elite Sisters
2. Tsiese Basa YO vs Tiemakhe Kidima

## Men's Junior Hockey World Cup nung Vivek Sagar-i India team captain inyaktsü

**New Delhi, Yimpoksüi/ November 11, 2021 (Agencies):** Aruya aliba FIH men's junior World Cup, koba November 24, 2021 nungi tenzütsü, iba asayamung nung India tebur hockey atema Olympic bronze medal angur Vivek Sagar Prasad-i captain inyaktsü.

Iba asayamung nung alima tesem ajunga nungi team 16 agi shilem agitsü. 2016 küm Men's Junior Hockey World Cup nung India team-i takok angu.

Arishi küm 21 tain Vivek, shibai taküm August ita Tokyo Olympics nung külem senior team den shilem agia otsüsüsüsa Olympic bronze medal takok angu, pai Junior World Cup nung captain inyaktsü. Kasa mapang, 2018 Youth Olympics silver-medal angur aser defender Sanjay-i vice-captain ama Vivek den yariteptsü.

Dinachandra Singh Moirangthem aser Boby Singh Dhami naprongla 'alternate players' ama shimogo aser

züngsem 18 squad nung asayar kar yiru mesüra Covid-19 putet nungang parnok melen tena asayatsü.

Iba round robin league nung, November 24, 2021 nü India team-i France den asayatsü. Iba sülen tasügnü (November 25) parnoki Canada den asayatsü. Iba sülen November 27 nü parnoki Poland den asayatsü. December 1 aser 5, 2021 tsüngda knockout match tem asayatsü.

Men's Junior Hockey World Cup nung Belgium, The Netherlands, Argentina, Germany, Canada, South Africa, Egypt, Pakistan, Korea, Malaysia, Poland, France, Chile, Spain aser USA team temi shilem agitsü terenemba lir.

"Saisapong nung pei linük tenüng nungi asayatsü asoshi asayar tajungtiba rongnung nübu 18 shimtsü ya mapa tasak. Iba team nung adentsü asoshi asayar ajaki tesüiba ita 12-18 nungi meranga asaya aruogo," ta men's hockey team chief

coach Graham Reid-i ashi.

"Ajisüaka, COVID tenokdangba aser senotsü peria manguba ajanga timtem balala ajangshia aruogo. Onoki asayar 20 - team nung züngsem 18 aser alternate players' 2 shimogo aser Junior World Cup Champions title tanaben takok angutsü asoshi parnoki junga asayatsü imlar," ta pai ashi.

"Iba asayamung nung terepranger mali yongjia, Olympics ajanga hockey nung adener ajaki jangratema shilem agiba sayuogo," ta Reid-i ashi.

Men's Junior Hockey World Cup atema India Squad nung - Vivek Sagar Prasad (C), Sanjay (VC) Shardanand Tiwari, Prashant Chauhan (GK), Sudeep Chirmako, Rahul Kumar Rajbhar, Maninder Singh, Pawan (GK), Vishnukant Singh, Ankit Pal, Uttam Singh, Sunil Jojo, Manjeet, Rabichandra Singh Moirangthem, Abhishek Lakra, Yashdeep Siwach, Gurmukh Singh aser Arajjeet Singh Hundal nung dena lir.



Chuchuyimlang Kaketshir Telongjem Dimapur aser Ao Kaketshir Telongjem Dimapur friendly futsal match ka November 09, 2021 aonung Jungyard Ground, Padumphukri nung asaya liasü. Iba asaya nung Dimapur Naga Students' Union tir, Moayanger Jamir-i süngo jemdakja liasü.

## 'Para Badminton Player of Year'

atema Pramod Bhagat nominate süogo

**New Delhi, Yimpoksüi/ November 11, 2021 (Agencies):** Brehostibarnü, 'Male Para Badminton Player of the Year' atema badminton asayar trok rongnung Tokyo Paralympics nung gold medal takok angur Pramod Bhagat nominate süa liasü.

World champion Bhagat, shibai otsüsüsüsa September ita Tokyo Paralympics nung men's singles SL3 class nung gold medal angu, 'Para Badminton Pair of the Year' nung tanga nominee pungo den Manoj Sarkar aser pa tenüng shim.

Tokyo Olympics - men's singles SL3 class nung Sarkar-i bronze medal angu

Arishi küm 33 tain Bhagat, shiba arishi küm 4 alidang polio tashidak agi atong, pai kiyongertem badminton asaya anguba sülen, iba saisapong asayatsü jangradok. 2006 küm para badminton nung ajemoka shilem magidang, pai 'able-bodied players' den asaya liasü.

Tang, Bhagat ya SL3 nung world no. 1 aser Asian champion ka lir. SL3 classification nung, tsüngtsüker athlete tem tokteper.

Iba able-bodied category nung Bhagat dak alaka nominee rongnung India nung ka danga mali.

Denmark nung asayar

Viktor Axelsen aser Anders Antonsen, China nung Wnag Yi Lyu aser Japan nung Yuta Watanabe tem (able-bodied) Male Player of the Year atema nominate süogo.

Tokyo Olympics nung Axelsen-i gold medal angu.

China nungi Tokyo Games nung gold medal angur (women's singles), Chen Yu Fei, Spain tsür Carolina Marin, Taipei tsür Tai Tzu Ying aser Japan tsür Akane Yamaguchi nung 'Female Player of the Year' atema nominate süogo.

COVID-19 wara ajanga, 2020 and 2021 seasons (November 1, 2019 to October 31, 2021) ayimjemtsü atema eligibility period atsülangja liasü.

November-December tsüngda Indonesia nung HSBC BWF World Tour indang Bali Leg asayaba mapang takok angurtem sangdongtsü.

Badminton World Federation (BWF)-i ashiba agi, award category tasen ana - Pair of the Year aser Para Badminton Pair of the Year tenzütsür.

"BWF Awards Commission-isa Guatemala nungi Kevin Cordon shibai Olympic Games pezü nung shilem agi aser Tokyo 2020 nung semifinal tashi asaya, iba sentong nung pai ajangshibatem metetdaksütsü," ta BWF-i ashi.

## Paul Pogba-i World Cup qualifier nung shilem magitsü

**Yimpoksüi/November 11, 2021 (Agencies):** Star midfielder, Paul Pogba tepi nung timtem adokba sülen, France indang World Cup qualifier match ana (Kazakhstan aser Finland) nung pa masayatsü. Manchester United nungi asayar, Pogba, shibai Hombor nikongdang külem team nungi asayar kar den training session ka nung shilem agia liasü, iba session agiba mapang ajungbena pa tepi nung timtem adokba sülen, moapu nungi team doctor Franck Le Gall den külemi pa tukadok.

"France indang taruba asaya ana (World Cup qualifiers - Parc des Princes nung Kazakhstan aser Helsinki nung Finland) nungi Paul Pogba agientsüsa kumadok," ta sangdong nung shia lir.

France squad nung Pogba melena AS Roma indang Jordan Veretout asayatsü.

Tang, iba qualifier Group D nung France pur asaya trok nungi point 12 ngua lir aser

taruba asaya nung Kazakhstan kokra sangküm indang World Cup finals atema parnoki jenjang ka ajangzüktettsü.

Ajisüaka, Coach Didier Deschamps-i, World Champion - France puri group game 7 nung asaya khen danga takok manguba telok - Kazakhstan den asayatsü lir asünung, alizüng matong yur temulung lema malitsü asoshi tekümdangtsü agütsü.

"World Cup atema qualify asütsü mechi, alizüng tongtettsü nükla yur asayatsüla aser ajak dang ibaji tongtibangtiba lir. Iba alizüng tongtettsü asoshi rangloker inyaktsü," ta news conference ka nung Deschamps-i ashi.

"Kazakhstan team ama ka den ang asayatsüji, onok World Cup atema qualify süogo ta temulung lema malitsüla. Iba asaya (Kazakhstan) akoktsü teimla yur aser temulungtetba tulu nung onoki asayatsü," ta pai ashi.

Kazakhstan dak alaka, taruba Mongolbarnü, France team pur Finland-i aotsü.

## BILEM DANGANG

"Ochimashi rongsen bendenbaji taküm nung atakatem jaoker dang."